

Dem Durchleuchtigsten / Hoch=
gebornen Fürsten vnd Herin / Herrn Ludwigen / Pfalz=
graffen bei Rhein / des Heiligen Römischen Reichs Erzhertz=
sch und Churfürsten / Herzogen inn Baiern etc. meinem Gnä=
digsten Fürsten vnd Herren.



Durchleuchtigster Churfürst / Gnädigster
Herr: Zurhumb des Feldbauens / kan neben sein an=
dern vielfaltigem Lob / herlicheres kaum angezogen
noch fürgebracht werden / dann das sein des Feld=
bauens übung vnd Gebrauch / auch vor dem fall vn=
serer ersten Eltern / inn der Paradisischen vnschuld /
gleich am andern tag / nach Schaffung der Himmels=
feste / in dem Lustfeld Eden / ist von dem Ewigen Ers=
schaffer Himmels vnd der Erden / vnd also dem ersten Feldbauistuffter / ange=
sehen / vnd nach fünff tagen auffgesetzt vnd inn die übung gepracht worden.

Dann / inn massen die ältesten Kirchenlehrer darvon schreiben / es
nicht vermutlich / das der erste Mensch Adam / vnd nach im alle Menschen /
wann sie inn der geschaffenen vnschuld bestanden / solten inn müßiggang
des Paradeißgartens gepflegt vñ genossen haben: Vnd dasselbig auß treis=
en vrsachen.

Erstlich / dieweil der Mensch auß Seel vnd Leib erschaffen bestehet:
die Seel aber ire ergötzlichkeit vnd auffenthaltung nicht an den Irdischen
früchten des Lustgartens / sondern an der ewigen himlischen Seelenspeiß
vnd frucht der anschauung / betrachtung vnd preisung Göttlicher vnauß=
sprechlicher güte / hat können haben: Hingegen der Leib / seine im zuständige
leibliche lust vnd freud / an wartung vnd allerhand ime ergötzlicher vnd ge=
fälliger pflanzung vnd zweigung der Gartenbaum vnd Kräuter / (gleich=
wol one einige müß / schwenß vnd bemüdung) gehabt.

Fürs ander / dieweil dem ersten Feldman Adam / die neugeschaffene
vnd gesegnete Erdgewächß vnd Feldfrüchte / sonst zu keiner gnugsamer er=
götzlichkeit / lust vnd fräud (derhalben er doch inn die Paradisische Neue=
rei gesetzt worden) gedienet hetten / wann er nicht für lust sich daran vnd da=
mit üben vnd gleichsam erkurtzweilen mögen.

Vnd entlich / dieweil solche lustige Feldübung oder Gartenbauung
im Paradiß präuchlich vnd befohlen gewesen sein / auch die wort des HERRN
vermögen vnd außweisen / da er vnser erste Eltern / des gartens hat
pflegen vnd warten heissen: welche pfleg vnd wartung / engentlich / nicht on
etwas arbent / schaffen vnd thun (welchs doch / wie vorgedacht / on müß vnd